



## Hentikan sementara riadah di Pantai Chenang, Tengah

Oleh Hamzah Osman - Julai 1, 2023 @ 3:31pm  
bhnews@bh.com.my

LANGKAWI: Orang ramai dinasihatkan agar peka dengan amaran bendera merah yang dinaikkan di Pantai Chenang dan Tengah di sini, susulan ramalan cuaca buruk yang berlaku mulai hari ini hingga Rabu ini.

Pegawai Angkatan Pertahanan Awam Malaysia (APM) Daerah Langkawi, Kapten (PA) Ahmad Shahfikri Darus, berkata tanda amaran itu bagi memberi peringatan kepada masyarakat berkaitan risiko menanti di kawasan terbabit.

"Bendera merah telah dinaikkan oleh anggota APM yang bertugas rutin di kawasan terbabit sejak petang semalam sehingga cuaca buruk yang melanda ketika ini kembali reda dan selamat untuk aktiviti riadah.

"Pada jam 9 pagi ini, kedua-dua kawasan merekodkan air pasang setinggi 3.1 meter dan tiupan angin selaju 42 kilometer sejam (km/j), sekali gus berpotensi menyebabkan ombak tinggi," katanya dalam kenyataan di sini, hari ini.

Ahmad Shahfikri berkata, akibat cuaca tidak menentu itu, orang ramai termasuk pengusaha sukan air di kawasan Pantai Chenang dan Tengah diminta lebih bertanggung jawab, berhati-hati dan peka terhadap persekitaran.

"Kita menasihatkan masyarakat kalau boleh hentikan sementara waktu semua aktiviti riadah dan rekreasi, selain segera memaklumkan kepada pihak berkuasa jika berhadapan keadaan cemas," katanya.

Sementara itu, mengulas hujan lebat yang melanda pulau ini sejak awal pagi ini, beliau berkata, paras air pada tahap waspada mencecah 3.1 meter (m) dicatatkan di Sungai Melaka di Padang Matsirat dengan trend menaik.

"Paras air di Sungai Melaka di Bukit Kemboja dan Sungai Kuah pula masih pada tahap normal selepas masing-masing mencatat 5.39m dan 1.18m, walaupun menunjukkan trend menaik susulan hujan berterusan," katanya.